

尚學校治教興行士子立祠於學

趙荆字道授昌化人生時父夢一道人以手簡

書荆字授之因以爲名紹興甲戌中南省第

淳熙中官至朝奉郎欽州判官老能戒得以

廉幹著名

侯畠温州樂清人授合浦尉有才猷愛民卹士

後死海州之難其鄉皆立廟賜額旌忠諡節

毅所著有霜崖集

崔與之廣東增城人授廣西提點刑獄時廉屬

廣西路與之徧歷欽廉郡縣秋毫無擾停車
裁決獎廉劾貪興利革弊風采凜然人次其
事爲海上澄清錄高宗嘗刻其所申諭者號
嶺海便民榜入排和議出修戰具後辭丞相
樞密命南歸理宗書其文集云白麻不起千
載一人蓋古未有辭相位者故特云

錢益廣東東莞人登淳祐進士歷廉州鹽官在
任五年所得常費不歸之私皆以補綱運之
力經畫鹽局事宜不擾而辦自著嵯局微勞

一帙鹽司聞其政蹟于朝再調靜江府僉判
馬堅岩昌人一家父叔兄弟皆以忠勇爲名將
而堅與其兄塋特顯咸淳中知欽州撫綏諸
蠻邊境安堵徙知邕州後總軍靜江元兵攻
之城破死于難

元范梈字德機清江人中丞董士選延之家塾
以朝臣薦爲翰林院編修秩滿擢海北南道
廉訪司照磨以延祐三年秋至郡巡歷遐僻
不憚風波瘴癘所至興學教民雪理冤滯甚

衆於郡城西南隅訪得海角亭遺趾屬郡吏
爲復建自爲記勒之石其隸法甚古爲其自
書云所著詩文多傳於世惇持身廉正居官
不可干以私疏食飲水泊如也吳澄以道學
自任少許可嘗曰若德機可謂特立獨行之
士矣

王允恭字敬居蠡州人尹石康縣有善政以興
修學校爲務至順二年爲潮總管有古賢守
風潮人祀於名宦

凍阿木洛陽人欽州達魯花赤勤於政務興學
校開屯田增軍儲置義倉招流民仁政旁洽
邦人思之

吳正卿字素臣遂溪人元統間爲合浦尹杜絕
干謁所得俸入以奉親餘周親黨無餘羨海
北憲臣交章薦之旣去民有遺思仕至南寧
知軍

鄭光祖字時若福建侯官人知靈山甫下車詢
民疾苦勞心撫字教養兼施至今人懷其德

明脫因蒙古人也洪武元年知廉州時流民未盡歸農多方招諭未踰歲農皆復業勸課農桑百廢俱興旣去而民思之

汪大賓連江人舉孝廉洪武中任廉州府經歷行政公平人皆愛之以知府殷革薦陞禮部員外郎

鄧忠湖廣德安人洪武中任靈山縣典史行政利民後陞工部主事

何叔川麗水人由人材洪武癸酉知欽州所屬

長塾鎮官林佛祖盤訐擒獲守禦百戶胡金
之子與家人私販番貨胡椒十八裏解人及
椒至州叔川方遣人逮其家屬金令軍吏楊
春賄以白金十八兩請免械送叔川拒不從
竟械繫并所賄送廣東道御史問理旣得實
發審大理引奏喜其廉能命依律犯者處斬
王仍籍其家貨悉賞叔川云

劉學士文集
雙槐歲鈔

殷革連州星子人監生洪武三十一年知廉州
府廉能勤慎勸課農桑作興學校政聲大著

蕭文舉江西南昌人洪武三十一年任合浦縣丞公勤廉謹恤衆濟貧永樂初徵拜主事

王勉餘干人永樂初任靈山縣丞廉勤正直陞順天府治中民思之不忘

蔡維溥泉州晉江人永樂三年由進士知香山性純篤喜怒不形勸勉學校撫集逃民驅除虎患閭里以安陞知欽州爲政如香山尤切撫字芟除豪猾州中稱治

朱勤錢唐人進士正統三年任廉州府功績多

所建置入祀名宦

林錦字彥章號雙溪福建連江人舉景泰元年鄉貢授合浦學訓導時蠻寇充斥內外無備錦規畫皆懸合機宜都御史葉盛異之遂檄攝靈山至則患無城守始據形勢立排柵設戰守具賊畏避莫敢嚮邇未幾以秩滿去民曰公去賊復來我無以保我生逃之山盛乃以狀聞請令靈山從之許馳驛之官蓋異數也民間之卽復來歸適歲大饑盜益熾錦單

騎入壁諭以禍福附縣二十五獠皆聽命其
遠地不服者縱兵剿之天順壬午正月敗賊
於羅禾水二月敗賊於黃姜嶺五月大敗賊
於新庄前後斬獲千餘級還所掠倍之已而
去排柵築土城徙縣治於中成化丙戌以功
擢廉守歲復大饑賊掠清和鄉錦肩輿諭解
者千餘人不服者殺之盡其經畧還定如靈
山戊子推按察僉事歷九年轉副使遂制置
一道立數百年長久計設團河營以禦西寇